

李文忠公奏稿

李文忠公奏稿

卷之六十七目錄

裁撤清賦局摺

光緒十六年正月二十一日

辦理朝鮮商務請獎摺

光緒十六年正月二十一日

朝鮮稅務司請獎片

光緒十六年正月二十一日

陳煦元李朝觀請獎片

光緒十六年正月二十一日

張夢元請開缺摺

光緒十六年正月二十二日

電綫並學堂報銷摺

光緒十六年二月初六日

輪船經費撥用藥釐摺

光緒十六年二月初六日

籌辦蒙自電綫片

光緒十六年二月十二日

阮炳福附祀程祠片

光緒十六年二月十二日

鹽商籌墊幣利片

光緒十六年二月二十二日

浙江勸捐直賑請獎片

光緒十六年二月二十二日

東明接設電綫片

光緒十六年三月初二日

分別撤留各局摺

光緒十六年三月二十一日  
附清單

轉運局無可刪減片

光緒十六年三月二十一日

武備學堂請獎摺

光緒十六年三月二十一日

海軍報銷摺

光緒十六年四月十六日  
附清單

請緩鹽課奏銷摺

光緒十六年四月十六日

馬玉山留營片

光緒十六年四月十六日

張夢元派辦機器局片

光緒十六年四月十六日

李文忠公奏稿卷六十七

全集一之六十七

桐城吳汝綸編錄

裁撤清賦局摺

光緒十六年正月二十一日

奏爲遵

旨裁撤清賦局據實覆陳恭摺仰祈

聖鑒事竊准戶部咨光緒十五年十二月初十日奉

上諭給事中賈賢奏請裁撤局員以免苛擾一摺直隸以升科地

畝爲名於省城及各州縣創設清賦總局分局無非位置閒員清

查升科係藩司應辦之事如果設立多局另派官紳不獨糜費且

恐需索貽害著李鴻章將各局迅速裁撤覆奏仍督率藩司飭令

各州縣將應辦升科地畝認真經理嚴禁騷擾等因欽此仰見

聖主體恤民艱力除冗濫至意臣查清賦之舉緣順直兩處旗園

地畝迷失多年無糧無租之地幾於接陌連阡自旗民交產兩次弛禁以後民間私相典賣規避升科既不向旗人納租亦不向州縣完糧殊不成事推原其故半由刁民亂法貪利半由報官勘丈吏胥留難需索是以相率隱匿糧多缺額疊經戶部飭查藩司督催率難破其銅習因而經界不正訟獄繁興黑地控案層見疊出不特有虧

國課亦實不便民生戶部洞悉此弊於光緒十三年三月奏定順直各屬議租議賦章程聲明若不因時制宜趕緊清理恐畿輔數千頃公私地畝租賦盡歸無著奉

旨飭令嚴飭各州縣遵照辦理其時升任藩司松椿以事關全省利害必須妥慎籌辦方免擾累按照部章將未盡事宜復經條議詳咨戶部核准照辦因事體重要案牘紛繁非酌派得力委員不

能任事而書吏積弊流之弊又不可不防藩司一人耳目難周特派臬司會辦幫同糾察按照嘉慶道光年間設局清賦成案就司署東邊閒屋爲辦公之所名曰清賦局取其事有歸宿一切仍由藩司主政無非欲辦理順速上下通氣杜弊便民起見應需局費無多由藩庫開款動支不准開銷正項此省城設局清賦實無位置閒員虛糜經費之情形也至各州縣並未設有分局亦無派過委員惟據完縣知縣牟懋圻稟清查荒地擬派公正紳士勸辦就城內書院廟宇作爲公所每月酌定日期令鄉民自行呈報不經吏胥之手既絕需索弊端亦免影射詭報應需茶飯紙筆等項概由官爲備給該縣意在便民查無流弊稟經批准照辦嗣該縣呈報荒地多而且速所擬辦法民皆樂從其餘州縣亦有稟准仿辦者現在辦理甫經數月各屬紳民首報頗形踴躍其報升科地

三千餘頃俱已遵章議糧先後報部核准爲數十年來所無之事其中大半係旗民交產未經弛禁以前民人假冒旗業從未投稅納糧者亦有不知來歷向無糧租者又有因地無主久訟未結不能完糧者均照部章逐漸清結於

國課民生實屬有裨夫查荒升科乃地方官應辦之政若辦法不得其宜騷擾需索在所難免故必嚴約州縣引用正紳多張告示剴切曉諭不准牧令派差下鄉不准書役勾通包庇務使民無疑慮僻絕風清今荒地已查出數千頃成效灼然院司各衙門並無一紙控詞其無苛擾騷動情弊尙屬可信然必有不便於勢豪猾吏之處設詞阻撓違騰口說貴賢原奏各節自係傳聞之訛茲既

欽奉

諭旨敢不慄遵即將省城清賦局裁撤督飭藩司恪遵部章詳晰

爰辦以專責成並通飭各州縣將應辦升科地畝認真經理嚴禁書吏不得稍有騷擾仍不得稍有鬆勁所有遵旨辦理緣由理合恭摺陳伏乞

奏  
皇上聖鑒謹



辦理朝鮮商務請獎摺

光緒十六年正月二十一日

奏爲查明派赴朝鮮辦理商務交涉原調續調各員已屆三年期滿照案彙核請獎恭摺仰祈

聖鑒事竊臣前奏派員赴朝鮮辦理商務交涉總辦分辦委員照出使外洋之例三年期滿由北洋大臣考核擇尤獎敘經總理衙門議奏奉

旨允准行知在案當於光緒九年間經臣奏派道員陳樹棠赴朝鮮創辦通商事務該員未及三年請假回國復於十一年九月間奏派三品銜升用道分省補用知府袁世凱前往接辦惟朝鮮偏處海濱強敵麇集該國每遇交涉事件在廷羣小多嗾西人從旁攪越巧爲扶制唆使該國自主經袁世凱等扼定朝鮮係中國屬藩每暗爲籌畫設法駁正以存體制而東西各國之人不免稍有

猶忌兼以朝鮮疑紛生風鶴頻警各該員日處危地猶能不避  
嫌怨不畏艱險相機因應措置合宜又自中國朝鮮通商以來奉  
天之旅順口山東之登州口等處時有游民游勇潛赴該國滋生  
事端經袁世凱飭派員弁在該國境內先後擊獲三百餘名之多  
分別懲治屬藩賴以靜謐尤較出使外洋各國僅跋涉風濤循例  
辦公者險夷有別現據袁世凱將當差年滿出力文武員弁開單  
併案請獎前來臣查朝鮮積弱之餘賴中國派員駐紮遇事設法  
維持俾免傾覆之患各該員供差三年均能實心任事操縱得宜  
洵屬異常出力百裨大局自應按照出使外洋章程一律給獎升  
用道袁世凱血性忠誠才識英敏力持大體獨爲其難擬請  
旨免補知府以道員分省歸候補班儘先補用並  
賞加二品銜以示鼓勵其餘出力暨駐防兵船及經理文報電報

各員升核其應敘勞績開單請獎除出力差弁咨明兵部核獎並  
飭取文武各員履歷分咨外所有查明派赴朝鮮辦理交涉商務  
原調續調各員已屆三年期滿照案彙核請獎緣由理合恭摺具  
奏伏乞

皇上聖鑒訓示謹

奏

朝鮮稅務司請獎片

光緒十六年正月二十一日

再查中國海關各稅務司稽徵洋稅辦事出力歲收加增歷經南  
北洋大臣會請獎勵在案茲據駐紮朝鮮總理交涉通商事宜升  
用道補用知府袁世凱稟稱朝鮮總稅務司美國人墨賢理釜山  
稅務司英國人何文德前經中國總稅務司赫德揀派來韓墨賢  
理並調派幫辦稅務司之俊秀梁如浩候選從九品周長齡仿照  
中國海關定章認真經理朝鮮稅餉日有起色墨賢理等猶能維  
持藩服名分願存中國體制殊爲異常出力墨賢理擬請

賞給三品銜何文德擬請

賞給四品銜梁如浩擬請以從九品不論雙單月遇缺儘先  
用周長齡擬請免選從九品以縣丞不論雙單月遇缺儘先  
用等情前來臣覆核並無冒濫仰懇

天恩俯准照擬給獎以昭激勸除咨總理各國事務衙門查照外  
理合附片具陳伏乞

聖鑒訓示謹

奏

陳煦元李朝覲請獎片

光緒十六年正月二十一日

再頻年直東豫蘇皖粵各省疊被災祲賑撫需款繁多幸賴南省紳董設法勸捐查戶散放源源接濟其能歷久不疲集成鉅款實由於辦理得人溯自光緒三年蘇浙紳士創設義賑公所廣爲勸募分收合解十餘年來計解助直粵東豫蘇皖等省賑銀不下二百數十萬兩於災區甚屬有裨主其事者爲金福曾謝家福陳煦元李朝覲經元善王松森施善昌嚴作霖等前經各省督撫臣分別奏明奉

旨嘉獎在案茲查陳煦元李朝覲先後積勞病故其生平善行有不能不據實瀝陳仰懇

恩卹者按陳煦元浙江烏程縣人係三品封職候選郎中當咸豐同治間浙江災民聚集上海蘇浙紳士設立難民廠各善堂該故

紳無役不從無處不捐旋得解救吞服生煙之法躬自醫治歲活千人無告貧民日踵其門該故紳不厭不倦務使得所宗族親故之待以舉火者更無論矣年終必廣購魚肉等類分贈貧戶使祀其先且戒之曰貧無忘本如是者三十年賑施歲數千金光緒七年江蘇川沙廳風災該故紳捐募經費三萬餘串以工代賑添建海塘四十餘里保護民田五萬餘畝鄉農德之十四年捐修自滙至蘇塘橋五十餘座行人稱便該故紳經勸賑捐苦心孤詣不遺餘力迨積勞成疾猶扶病至蘇籌商賑務中途病折回於十五年四月十八日在滙身故計該故紳經勸解助直粵東豫蘇皖賑銀二十萬兩有奇又李朝覲廣東香山縣人係四品銜知府用江蘇候補同知其在鄉里時曾建宗祠恤孤寡築隄防設義渡興水利講鄉約凡有益於鄉黨者無不以身任之寓上海後調施之舉

一如其在鄉時先後捐助義賑銀五千兩又另倡捐五千金在滬  
設立同仁醫院遠近貧民就醫者歲數千人勸募賑捐聲望素著  
人皆樂輸鄭州黃河決口後災民遍野該故紳義形於色分投募  
捐積勞致疾於光緒十四年二月初七日病故計該故紳經勸解  
濟直粵東豫蘇皖賑銀十三萬兩有奇該故紳等慷慨好義孜孜  
爲善始終不懈今既積勞病故未便任其湮沒由山東登萊青道  
盛宣懷直隸候補道金福曾等稟經飭據籌賑局司道查明核議  
詳請會奏前來臣查該故紳陳煦元李朝觀好義性成樂善不倦  
倡募賑捐爲數甚鉅奉行眾善矧恤尤多實屬有裨災區足資風  
教現值蘇浙水災尤賴各處紳宦集捐救濟其以死勤事者自應  
據情奏請

旌卹查李朝觀前於光緒十二年辦理湖北礦務因礦丁與土民



互關滋事適該紳在滬勸捐未能先事約束經湖廣總督臣裕祿  
奏參降三級調用光緒十三年兵部主事陶式釐遵其故父己革  
東明縣知縣陶冶安捐助棉衣合銀五千兩經臣奏請開復陶冶  
安原參處分奉

旨允准在案今李朝覲因公降調獲咎較輕捐資助賑與陶冶安  
情事相同相應懇

天恩將四品銜知府用已故江蘇候補同知李朝覲原參降調處  
分准予開復與三品封職已故候選郎中陳煦元一併

敕部議卹並准其自行建坊給予樂善好施字樣將生平事蹟列  
入各原籍府縣志書以彰善行而示觀感謹會同兩江總督臣曾  
國荃兩廣總督臣李瀚章江蘇巡撫臣剛毅山東巡撫臣張曜河  
南巡撫臣倪文蔚安徽巡撫臣沈秉成合詞陳請是否有當伏乞

奏聖鑒訓示施行謹

張夢元請開缺摺

光緒十六年正月二十二日

奏為福建藩司病難速痊呈請開缺恭摺仰祈

聖鑒事竊福建藩司張夢元前因行抵天津原籍舊疾復作未能

北上經臣據情代奏奉

旨賞假兩個月轉行欽遵在案茲又據該司稟稱抵津後調理多日筋骨痠痛有增無減醫者謂風寒入骨歷年已久氣血已衰斷難速效伏思福建係沿海要區藩司為理財劇任未便久懸現在假期屆滿請代奏懇

恩開缺俾得專心調理該司甫踰六旬從容醫治或可漸愈一俟病體復元即當赴都起病不敢稍耽暇逸等情前來臣查張夢元起家州縣屢蒙

簡擢歷任船政大臣廣西福建布政使廉正勤能卓著政績實為

兩司中不可多得之員茲因病難速痊呈請開缺查係實在情形  
理合恭摺由驛具陳伏乞

皇上聖鑒訓示謹

奏

電綫並學堂報銷摺

光緒十六年二月初六日

奏為南北各省電綫官督商辦光緒十四年由淮軍餉內津貼巡費並電報學堂用款循案報銷繕單仰祈

聖鑒事竊照天津至北通州及蘇浙閩粵等省設立電綫官督商辦由淮軍餉內開支津貼巡電弁兵糧乾並電報學堂用款業經臣截至光緒十三年十二月底止分晰彙開清單於十五年五月初九日專摺

奏銷奉

硃批該衙門知道單併發欽此並遵照部文另造細冊咨送核銷在案查電綫經費本係淮軍用款分外之事應歸經辦之員另行報銷仍於淮軍案內將動撥銀兩照數登除飭據督辦電報事務山東登萊青道盛宣懷核明十四年分舊管無項新收湘平銀五

萬二千九百七十三兩有奇內除撥還十二年分墊支經費湘平銀二萬兩前已報銷外實新收湘平銀三萬二千九百七十三兩有奇開除天津至北通州截至八月十七日官貼五年期滿止巡護電綫馬乾口糧經費湘平銀八百二十兩有奇蘇浙閩粵截至十二月底官貼五年期滿止巡護電綫馬乾口糧並修理巡房經費湘平銀一萬三千四百四十兩有奇又節省蘇浙閩粵巡費抵還商局經遞頭等官報費湘平銀六千五百五十九兩有奇天津電報學堂經費湘平銀一萬二千一百五十三兩有奇以上共開支湘平銀三萬二千九百七十三兩有奇實存無項詳請核奏前來臣查電報之設信息靈通有裨軍國大計此次自光緒十四年正月起截至十二月底止開支津貼各款均照上屆成案實用實銷並無絲毫浮冒天津至上海官貼巡費前於十三年二月底停

止已經隨案奏報其天津至通州巡費扣至十四年八月十七日  
期滿蘇浙閩粵巡費扣至十四年十二月底期滿均飭遵照奏案  
停給由商自行籌發所有商局津貼天津電報學堂經費亦於十  
五年正月起停給惟查該堂肄業各生俱已學有根柢北洋官電  
各局每遇更調學生需用之處甚多未便遽行裁撤應請改爲官  
辦俾該生等克底於成足資器使俟該生等出堂之後不復募補  
以期費用有減無增此後經費仍照案由淮軍餉內撥發歸天津  
海防支應局彙入官錢項下造報以清界限除飭將支給細數分  
晰造具清冊咨送戶工部查核外相應繕具簡明清單恭呈

御覽仰懇

天恩俯准照銷理合恭摺具陳伏乞

皇上聖鑒謹

奏



輪船經費撥用藥釐摺

光緒十六年二月初六日

奏為東海關洋藥釐金開支輪船經費不敷尙多請將土藥釐稅歸併抵支藉資補苴恭摺仰祈

聖鑒事竊查東海關所收洋藥釐金前經奏准作為泰安輪船經費之用不敷銀兩在於山東藩運兩庫巡防緝捕生息項下撥款接濟嗣因兩庫撥款仍不足用復請在於該關常稅項下動撥由部覆准歷經照辦在案茲查該關洋藥釐金近年約收銀二萬五千餘兩而泰安輪船每年應需薪糧燒煤軍火等項銀三萬六七千兩不敷已鉅尙有分期應還稅務司購買巡船銀七千五百兩又撥交稅務司洋藥棧房經費銀一千兩又照章提扣傾鎔緝私並各項善舉等銀四千餘兩均須取給於洋藥釐金雖藩運兩庫撥濟銀四千兩核計現在每歲尙不敷銀二萬餘兩至常稅一項

因須撥放京協各餉無可勻濟是以截至光緒十四年已虧挪銀  
四萬五千餘兩外有結欠閩廠修費銀二萬一千餘兩疊在催索  
無款籌還查光緒十三年泰安輪船經費因洋藥釐金不敷支撥  
動支土藥釐金以資彌補經部核准有案雖聲明嗣後不得再動  
惟應支各款或經戶部指撥或係歷奉在銷均屬無可核減而收  
款僅止此數用項既關緊要收數入不敷出勢不能不挪動別款  
暫濟眉急乃歷年挪墊已積成鉅虧而久假不歸則款更膠轕左  
右思維別無良策惟有將土藥釐稅仍照十三年准撥成案併歸  
洋藥釐金項下作正抵支藉資補苴並將土藥稅釐設法認真整  
頓力扼偷漏以期收數暢旺俾可漸清積欠庶於庫款有裨等情  
據東海關監督登萊青道盛宣懷稟請具奏前來臣等詳加覆核  
查係實在情形理合會同山東巡撫臣張曜恭摺具

奏伏乞

皇上聖鑒敕部查照謹

奏

籌辦蒙自電綫片

光緒十六年二月十二日

再滇越邊界電綫議與越南法綫相接經臣於光緒十四年十一月奏奉

批旨允准在案中法原約鎮南關一綫奏准後卽行接連東興蒙

自兩綫奏准後十八箇月內再接扣至本年四月已屆接綫之期

前據法國駐京使臣詢催惟蒙自至保勝一路須做至紅河東岸

乃可與法綫相連應先勘明實在里數及應需料物由滇就近派

員采辦當與兼署雲貴督臣譚鈞培往返電商旋飭督辦電報事

宜山東登萊青道盛宣懷轉飭雲南電局委員候補知府李必昌

於修理剝隘至蒙自電綫之便督同洋匠等先行查勘綫路嗣據

該員稟稱由蒙自勘至保勝紅河東岸界牌計程二百九十六里

須在正二月開工至三月瘴發人力難施請速籌款運料以便

如期互接滇省均屬官綫自應仍歸官辦該處僻居窮微轉運極  
難所需華洋材料水陸運費加以做工開局兩項摺節估計所需  
銀二萬兩滇省無力籌措查有光緒十一年奏設川滇電綫案內  
由四川借撥公款十萬兩發存商局領用擬令該局設法籌還二  
萬兩作為此項造綫之用以便妥速興工由盛宣懷擬議具詳請  
奏前來臣查議接蒙自至保勝電綫地居山僻路險瘴深購運物  
料均極艱難據稱各項費用估計需銀二萬兩滇省無款可籌接  
綫又難再緩現飭由商局先行籌還借款銀二萬兩在川省係已  
借之項在商局係應還之款移應急需洵為一舉兩得現今督同  
委員摺節支用工竣核實報銷將來法綫接連後仍責成盛宣懷  
及各局員等堅守約章隨時相機操縱務保自主之權勿使稍有  
流弊除鎮南關至同登一綫上年十二月已由兩廣督臣派員前

往龍州開辦東興至芒街一綫擬暫緩辦仍隨時由粵察酌並咨  
總理各國事務衙門知照外所有籌款接辦蒙自至保勝電綫緣  
由理合會同雲貴督臣王文韶雲南撫臣譚鈞培附片具陳伏乞  
聖鑒敕部知照謹  
奏

阮炳福附祀祠片

光緒十六年二月十二日

再記名提督呼松額巴圖魯阮炳福於同治元年隨臣率師赴滬  
隸程學啟所部開軍委帶後營每戰輒先號爲勇健二年六月官  
軍克復吳江縣進規蘇州蘇城悍賊老巢疊次攻圍未下其南浙  
西三郡尙爲賊據蘇賊恃爲聲援吳江爲蘇浙往來要衝因令阮  
炳福屯紮縣南之萬頃橋以當嘉興來路未幾援賊二十餘萬驟  
至猛撲環攻拒守旬餘大小十餘戰胸前右偏中鎗子穿脅後而  
出襄創督隊拒戰益力援師旣集會擊大捷賊始不敢北窺蘇州  
乃得合圍遂於是年十月開收復全吳之平得力於蘇州之克蘇  
州之克得力於吳江之守而阮炳福力扼要隘實爲首功復隨同  
克復嘉興府常州府湖州府長興縣廣德州等城並以先登著績  
髮逆旣平調辦捻匪扼紮江蘇桃源縣一帶進戰直東豫各省堅

遇窮追論功甚偉積官至記名提督呼松額巴圖魯光緒元年調辦北洋海防委帶天津練軍中營兼全營翼長練習泰西陣法善用新式利器步伐準綫極爲精熟直隸歷辦河務挑濬俱用淮練各軍阮炳福每親率隊伍晝夜駐工寒暑無間去冬觸發胸脅舊傷於今年正月二十二日在營病故竊維平吳之初程學啟開軍實爲淮軍之冠所部故多驍將而阮炳福尤以沈鷺著稱吳江一役憑孤壘抗強寇以寡禦眾堅定不搖日與血戰相持以待援師之至卒收戡定之功身受巨創僅而不死功高戰苦一時所推終以觸發舊傷奄忽致殞追念前勞深可惋惜合無仰懇天恩敕部將阮炳福照提督立功後在營病故例從優議卹並附祀程學啟專祠淮軍昭忠祠以彰盡烈理合附片陳請伏乞聖鑒訓示謹



友

友

友

鹽商籌墊帑利片 光緒十六年二月二十二日

再臣欽奉正月二十二日

上諭內務府奏恭備要差懇飭催欠款一摺著籌解銀十萬兩等因欽此當經轉飭籌解茲據鹽運使額勒精額詳稱遵查長蘆應解內務府帑利原係承領帑本各商應交之款道光二十八年經欽派王大臣清查鹽務因承領帑本各商已參革物故無可著追每年應解利銀議歸現有各商攤繳本已名實不符歷年災歉頻仍引鹽運艱銷滯成本加重商累甚深每屆應交正課遞年奏請展緩尙難足數此項代賠帑利實無餘力攤徵是以累商仍有積欠然爲數尙不及十萬兩委係實欠在商並非徵存在庫溯查歷屆恭備

大差奉

旨飭提帑利皆係通融挪墊迄今尚未徵起歸補本年恭備謁  
陵大差內務府奏催積欠帑利蘆商當積累之餘筋疲力盡實屬  
無可比追庫儲支絀亦無閒款挪墊惟恭辦

大差事關重要不得不於萬分爲難之中作移緩就急之計現經  
竭力籌墊銀三萬兩以一萬五千兩作爲解還積欠以一萬五千  
兩作爲應解本年帑利派員解赴內務府交納以濟要需其餘應  
解本年帑利銀兩仍俟屆時徵有成數再行找解清款等情具詳  
前來臣查積欠帑利實係累商歷年拖欠並非微存在庫該司設  
法籌墊積欠並本年應解帑利銀共三萬兩實已不遺餘力除分  
咨內務府戶部查照外理合附片覆陳伏乞

聖鑒謹

奏

浙江勸捐直賑請獎片

光緒十六年二月二十二日

再浙江勸辦順直賑捐尤爲出力官紳前經臣奏請給獎旋經吏部以浙江布政使許應鏞請給一品

封典同知銜補用知縣楊光熙現官係府經歷請給五品

封典均與定例不符應令另核請獎原請以知縣用之仁和場大

使程雲驥係鹽務人員不得派委地方差使應將獎敘撤銷等因

查光緒十二年順直水災待賑戶口旣眾辦河工又多官款籌

措爲艱補救乏術該司許應鏞首先倡捐並督率各員廣爲勸募

集成鉅款源源解濟其仁和場大使程雲驥係兩浙首場鹽商多

所熟悉用能竭誠勸辦與委辦別項地方差事不同且此次賑款

出自鹽商樂輸者居多該官紳遠在隔省本無應辦之責又當物

力艱窘之時尙能慷慨恤鄰力維義舉洵足以風勵薄俗若不優

給獎敘恐不足以示鼓勵安徽湖南等省官紳勸辦順直賑捐經  
臣奏獎升階等項奉

旨允准經部駁改並將鹽務人員撤銷復經臣奏懇仍照原保給  
獎於光緒十四年四月十七日奉

旨允准欽遵有案今浙江官紳事同一律所有浙江布政使許應  
鏞請改給隨帶加二級知縣用浙江分缺閒用府經歷楊光熙前  
於陝甘協餉案內出力保加布理問銜光緒十二年八月二十日  
奉

旨依議欽此請照銜改給六品

封典浙江仁和場大使程雲驥請仍照原保以知縣補用仰懇  
天恩敕部照擬給獎以昭激勸理合附片具陳伏乞

聖鑒訓示謹

奏

東明接設電綫片

光緒十六年三月初二日

再東明黃河爲最要之工每遇伏秋大汛奇險營生籌防緊急儻消息遲滯必致貽誤事機東明距天津千有餘里隔越大河文報多阻自應添設電綫以期呼應靈通相機調度查山東曹縣設有商綫由該處接設至東明高村工次計程一百三十五里需款無多當飭候補道奈昌宇等查勘辦理並派練軍一哨幫同做工以節經費茲據該道等詳稱於上年十一月初七日開工自黃河中汛高村設立報房由開州地界立桿入東明縣境經城東北復入開州境再入東明縣界以達荷澤長垣等縣地面復經東明縣境抵曹縣界經過劉凸者一帶村莊入曹縣城與商綫電桿銜接妥機器於十一月二十五日一律工竣共用物料運腳薪水工食等項合湘平銀六千七百三十五兩九錢四分九釐七毫等情前

來臣覆核無異除飭將用過銀兩在練餉局收存大名釐金項下撥發清款外理合附片具陳伏乞

聖鑒敕部查照立案謹

奏



分別撤留各局摺

光緒十六年三月二十一日

奏為直隸原設各局查明分別撤留核減經費開單恭摺覆陳仰

聖鑒事竊准戶部咨光緒十五年十一月十五日奉

上諭國家綜核度支必先嚴除冗濫著各直省將所有各局通行查核或刪減或歸併其有不能裁者卽將按月經費限定數目不准任意增添議定現有各局開單奏報並將各局經費每月若干咨報戶部存案等因欽此仰見

聖主慎重庫款力杜虛糜至意臣自應共體時艱將所有各局能否裁併刪減詳加考核分別辦理當經轉飭司道並各局體察情形切實籌議去後茲據該司道等陸續議詳前來臣查直隸拱衛京畿幅員遼闊地方緊要政務之繁甲於各省加以籌辦防務創

設北洋海軍規模愈遠事務愈繁卽需才愈眾凡籌餉練將修船製器鑄造軍火置設電綫以及儲備械具煤斤無一而非急務且其中仿用西法者十居七八尤爲藝精理奧學有專家人難求備不得不兼收並蓄各取其長別類分門各專其責庶羣策羣力克底於成是以地方則有清訟發審保甲水利籌賑車船釐金徵信等局海防則有練餉支應軍械機器製造電報船塢工程等局並分設營務處建立水師武備各學堂及醫院煤廠俾專責成而免貽誤但各局每用一人必察其事之繁簡才之短長以定薪水之多寡量材器使稱事授精務期一人得一人之用並無濫竽充數更無位置閒員虛糜帑項情弊其事可相因而理者每以一局而兼數事藉以節省經費其費可由外籌給者則就本省自行設法免動報部正款茲本

諭旨飭令刪減裁併臣按照各局詳審情形悉心確核除清訟發  
審保用籌賑車船等局經費均係由外自籌並不動支報部款項  
應仍其舊俾免廢事釐金局並無額定經費向照部章視其收數  
多寡酌提一成以作費用亦應循舊辦理不准稍有逾違徵信局  
月支經費僅銀一百四十兩四錢歷經報部准銷無可再減惟水  
利局月支經費銀五十四兩雖爲數無多第現在局務較簡可以  
隨時派員查辦該局應行裁撤卽以二月底截止保定練餉局月  
支經費應刪減銀三十六兩保定營務處月支經費應刪減銀一  
百十二兩電報局月支經費應刪減銀五十八兩計每月共裁減  
銀二百六十兩歲可節省銀三千一百二十兩此皆於無可刪減  
之中力圖撙節之計其餘各局船塢並營務處學堂醫院煤廠皆  
海防大局所關祇有事浮於人並無人浮於事委難裁併刪減况

北洋創辦海軍力圖自強一切規制尙須逐漸擴充祇以時艱餉  
絀不能不因陋就簡所需經費前經總理海軍衙門斟酌損益奏  
定章程銀數極爲核實聲明將來不敷准予加增現支之數尙難  
作爲定額無從再行減少總之現在庫款奇絀度支又極浩繁疊  
奉

聖訓諄諄告誡但能省一分經費即可增一分財力斷不敢瞻徇  
情而稍涉虛冒亦何敢過從刻覈轉誤事機茲謹遵

旨將必不能裁者核定各局員弁司事匠役學生人等薪工公費  
等項月支經費銀兩數目開具清單敬呈

御覽除開單咨送戶部存案外理合據實恭摺覆陳伏乞

皇上聖鑒訓示謹

奏

謹將直省現留各局員弁司事匠役學生人等薪工公費等項月支經費數目繕單恭呈

御覽

保定練餉局刪減銀三十六兩月支銀四百二十八兩

保定營務處刪減銀一百十二兩月支銀四百十五兩四錢

徵信局月支銀一百四十四兩四錢夏季涼棚冬季煤炭另行加支

天津海防支應局月支銀九百七十六兩四錢

天津營務處月支銀八百七十三兩二錢

電報總分各局刪減銀五十八兩月支銀一千三百四十八兩

天津電報學堂月支銀九百兩內采買機器等項用款增減無定

天津軍械總局月支銀六百八十六兩

天津機器局月支銀九千兩內工匠時有增減外有應撥各船薪

糧並隨時購辦機器料物建修工程等項用款多寡無定均不在內

天津行營製造局月支銀六百三十五兩

水師學堂月支銀二千四百兩五錢內學生贈銀時有增減工匠亦須添募

武備學堂月支銀二千二百六十五兩內有學生考試按等酌加增減無定

水師營務處月支銀五百八十四兩

大沽船塢月支銀四千三十七兩三錢內工匠時有增減

旅順海口魚雷局兼魚雷營廠學堂月支銀二千二百七十一兩一錢內工匠並學生時有增減

旅順海口船塢工程局兼理電燈潮標等事月支銀八百七十九兩

兩俟鴨成開工須另酌定經費

旅順海口水陸軍械庫廠月支銀四百八十六兩二錢內軍械學生考試按等酌加增減無定

旅順威海水師煤廠並大沽礮船公所月支銀九十一兩二錢

旅順威海水師醫院月支銀三百一十兩

威海劉公島水師機器廠月支銀七百三十四兩內工匠時有增

減

威海水師學堂月支銀七十八兩該堂俟員役學生募齊須另酌定經費

綏鞏軍支應並製造軍械局其月支銀四百五十兩一錢

轉運局無可刪減片

光緒十六年三月二十一日

再查淮軍各營分紮直隸沿海地方及奉天旅順口大連灣山東威海衛等處爲北洋海防重鎮所需糧餉仰給於湖北湖南江西安徽江蘇各省通力勻撥轉輸數千里報解偶有愆期則支應立形竭蹶催提轉運必須設局經理源源接濟方爲周妥前於武昌揚州清江濟甯分設轉運四局將兌收各省撥解淮餉隨時分別水陸程途節節轉運於天津設立銀錢所專司支發各軍月餉分設軍械局收發各項軍火礮械應需各局經費疊經刪減核定造報在銷在案茲欽奉

諭旨令將各局通行查核刪減歸併有必不能裁者將按月經費限定數目開單奏報等因當經轉飭遵照今據該局所核明詳請覆奏前來臣查淮軍餉械跨越數省道路遙遠設局遞送輓轡周



轉爲軍士命脈所關實係無可裁併各局酌用委員數人僅給薪水銀兩其出差盤費並辦公書識辛紅紙張等項均例所應給之款並未開銷雖疊據各局援例請領均令勉任其難迄未核給原定支款其止銀七百四十八兩委係力求撙節實難再行刪減遵將各局限定經費數目開具清單恭呈

御覽除開單咨送戶部存案外理合附片具陳伏乞

聖鑒謹

奏

武備學堂請獎摺

光緒十六年三月二十一日

奏爲天津武備學堂又屆兩年期滿應將任事出力員弁及屢考優等學生照章擇尤請獎恭摺仰祈

聖鑒事竊查天津武備學堂挑選各營精健聰穎略通文義之員弁入堂肄習兵法經臣奏准將教習繙譯各員及屢考優等學生照總理衙門同文館成案二年奏保一次以示鼓勵嗣因該堂創設已逾兩年辦理著有成效業經臣將在事尤爲出力員弁按照異常勞績酌保十四員於光緒十三年十月二十五日具奏奉硃批著照所請該部知道欽此旋經吏部核准覆奏以嗣後二年保獎一次卽以現在所保人數爲定額照尋常勞績核辦各行遵照在案查該教習繙譯等自得保獎以後趨公益加奮勉會督德國教習兵官朝夕課導始終不懈俾在堂弁兵學生均能認真肄

習日起有功營經派員月試季考並親自考驗該弁兵學生於測繪算化諸學並馬步礮隊操演陣式技藝及礮臺營壘工程做法一律嫻熟洞悉竅要實屬成效昭然有裨武備其屢考優等學生飭回各營轉相傳授仍選新生入堂肄業更番迭進成就尤多茲自光緒十三年十月二十五上次開保之日起扣至十五年十月二十五日又屆兩年期滿所有在事出力員弁並屢考優等學生自應照章擇尤請獎惟上次開保僅列十四員係將未滿二年及勞績稍次者均已剔除今有核其期限早逾二年而勞績卓著者不能不量予獎勵其有前次雖已給獎現值二次限滿當益形勤奮者又不得不照章列保且該堂為儲備將材之地當此海防需人力圖自強亟宜加意培植勉其上進前次開保事屬創始本難據為定數現在規模逐漸擴充肄業學生已較上屆為多歷

年既久屢考優等若因限於定額不予列保未免向隅擬請酌量加保二員藉資鼓勵相應開具清單敬呈

御覽仰懇

天恩俯准照擬給獎以昭激勸除照章飭開各員履歷咨部並應給干把以下末弁另咨兵部註冊仍咨明總理海軍衙門知照外理合恭摺具陳伏乞

皇上聖鑒訓示謹

奏

海軍報銷摺

光緒十六年四月十六日

奏爲光緒十四年分收支三鐵艦四快船薪糧公費及洋員薪費等項銀數分晰報銷恭摺仰祈

聖鑒事竊查北洋定遠鎮遠濟遠三鐵甲船官弁人等薪糧公費等項隨時派員赴海軍衙門請領分別轉給薪糧公費醫藥費照章改發京平其煤油修費雜支用款或係規平或係湘平行平並無一定與額支薪糧不同且多與洋人交涉均按原平折合庫平支發概不扣平經海軍衙門核准已將十二十三兩年用款奏明報銷嗣准兵部行令歸入海防經費案內造報因查三艦用款係赴海軍衙門請領海防經費係由各省關撥解各歸各款礙難合一必須專案造報仍咨兵部核銷又十三年十月間由英德兩國船廠造成遠靖遠經遠來遠四快船接帶回華比照濟遠船酌

定名餉數目自十三年十一月初一日起支亦按京平核發酌留  
洋員教習十三名議定薪飯應按關平核發所有四快船薪餉煤  
修等項用款仍由海軍衙門請領發給前經開具名餉清單並約  
估煤修雜支各款銀數奏咨立案茲據海防支應局司道將定遠  
鎮遠濟遠三鐵艦十四年分並致遠靖遠經遠來遠四快船十三  
年十一月及十四年分收支各款彙案分晰造報計三鐵艦官  
弁人等薪費項下共收京平銀十八萬四千四百十九兩八錢共  
支京平銀十八萬四千四百十九兩八錢收支相抵四快船華洋  
員弁人等薪費項下共收京平銀二十二萬四千一百九十四兩  
七錢五分一釐八毫共支京平銀二十三萬一千八百五十五兩  
五錢三分六釐八毫不敷墊支京平銀七千六百六十兩七錢八  
分五釐在於十五年領存三鐵艦四快船薪餉款內動支撥還歸

入下案造報又三鐵艦四快船煤油修費項下截存並新收其庫  
平銀十三萬六千九百七十九兩三錢五分九釐四絲五忽其支  
庫平銀八萬六千二百十三兩六錢六分七釐一毫八絲一忽一  
織尙存庫平銀五萬七百六十五兩六錢九分一釐八毫六絲三  
忽九微九織歸入十五年分列收再行滾接造報統計三鐵艦四  
快船共支薪糧公費等項銀四十一萬六千二百七十五兩三錢  
三分六釐八毫應統歸兵部核銷共支煤油修費等項銀八萬六  
千二百十三兩六錢六分七釐一毫八絲一忽一織內應歸兵部  
核銷銀四千四百六十兩四分一釐六毫四絲八忽一微七織應  
歸工部核銷銀八萬一千七百五十三兩六錢二分五釐五毫三  
絲二忽八微四織均係撙節動支並無絲毫浮冒具詳請  
奏前來臣復核無異除清冊分送海軍衙門戶部查照暨咨兵部

工部核銷外所有十四年收支北洋三鐵艦四快船薪糧公費及洋員薪費等項銀數理合恭摺具陳並繕簡明清單敬呈

御覽伏乞

皇上聖鑒敕部核銷謹

奏



謹將光緒十四年收支定遠鎮遠濟遠三鐵艦致遠靖遠經  
遠來遠四快船薪糧公費醫藥費並洋員薪飯及煤油修費  
各銀數繕列清單恭呈

御覽

計開

薪糧公費醫藥費項下

舊管

無項

新收

一收光緒十三年分北洋防費扣存平餘庫平申合京平銀三萬  
四千二百一十一兩一錢四分三釐六毫一絲七忽查前件北洋防  
費項下支發薪餉等項自光緒十三年正月分起遵照海軍衙門

奏定新章改按京平扣發扣存平餘銀兩解交海軍衙門備用計  
十三年分共扣平餘庫平銀三萬二千一百五十八兩四錢七分  
五釐前經咨明留抵三艦應領薪餉以免領解之煩按每庫平九  
十四兩申合京平銀一百兩共申合京平銀三萬四千二百十一  
兩一錢四分三釐六毫一絲七忽

一收海軍衙門發給三鐵艦薪餉庫平申合京平銀十五萬二百  
八兩六錢五分六釐三毫八絲三忽

以上兩款共收京平銀十八萬四千四百十九兩八錢

一收海軍衙門第一次發給四快船薪餉庫平申合京平銀五萬  
三千一百九十一兩四錢八分九釐四毫

一收海軍衙門第二次發給四快船薪餉庫平申合京平銀八萬  
五千一百六兩三錢八分三釐

一收海軍衙門第三次發給四快船薪餉庫平申合京平銀八萬五千八百九十六兩八錢七分九釐四毫

以上三款共收京平銀二十二萬四千一百九十四兩七錢五分一釐八毫

統計五款共收京平銀四十萬八千六百十四兩五錢五分一釐八毫

開除

一支定遠鎮遠兩艦官弁人等光緒十四年十二箇月薪糧公費醫藥費京平銀十四萬一千二百七十九兩六錢

一支濟遠艦官弁人等光緒十四年十二箇月薪糧公費醫藥費京平銀四萬三千一百四十兩二錢

以上兩款共支京平銀十八萬四千四百十九兩八錢

一支致遠靖遠經遠來遠四快船官弁人等光緒十三年十一月至十四年十二月共十四箇月薪糧公費醫藥費京平銀二十萬一千三百十兩六錢七分六釐八毫

一支致遠等四快船酌留洋員教習十三名薪飯京平銀三萬五百四十四兩八錢六分

以上兩款共支京平銀二十三萬一千八百五十五兩五錢三分六釐八毫

統計四款共支京平銀四十一萬六千二百七十五兩三錢三分六釐八毫應歸兵部核銷

實在

一不敷墊支京平銀七千六百六十兩七錢八分五釐

查前項不敷銀兩在於十五年領存三鐵艦四快船新餉款

內動支撥還歸入下案造報

煤油修費項下

舊管

一光緒十三年分截存三艦備用庫平銀三萬六千九百三十一兩一錢一分四毫四絲五忽又收回補給三艦公費多核湘平折庫平銀四十八兩二錢四分八釐六毫共存庫平銀三萬六千九百七十九兩三錢五分九釐四絲五忽

新收

一收海軍衙門發給三鐵艦四快船備用庫平銀十萬兩

以上管收共庫平銀十三萬六千九百七十九兩三錢五分九釐四絲五忽

開除

一支三鐵艦訂購德國克鹿卜廠各項礮彈後半價庫平銀二萬一千三百六十四兩九分三釐三毫四絲二忽八微四纖

一支三鐵艦十三年春夏兩季在大沽船塢修費庫平銀一千一百四十四兩五錢四分五釐

一支三鐵艦十三年秋冬兩季在大沽船塢修費庫平銀七百六十一兩一錢六分一釐三毫

一支定遠鎮遠兩鐵艦在香港進塢油底並修配零件工料等項庫平銀八千七百二十九兩一錢二分三毫

一支經遠來遠兩快船在香港洋廠修配銅抽水機價值庫平銀五十九兩一錢七分九釐六毫

一支三鐵艦四快船在滬修配各項價值庫平銀二萬八千八百五十六兩六錢六分七釐九毫

一支三鐵艦所設礮位購用德國克鹿卜廠子彈引火等件運存  
上海招商局棧租及修理木箱工料庫平銀一百二十五兩一錢  
三分七釐二毫

一支四快船軍火等項存滬棧租庫平銀三百二兩七錢三分七  
釐三毫

一支三鐵艦四快船勇役人等製給十三年分棉號衣褲一千三  
百八十四套價值庫平銀二千五十九兩六錢三分九釐九毫

一支三鐵艦四快船在上海等處購煤三千五百八噸價值庫平  
銀一萬八千五百三十六兩三錢四分三釐六毫九絲

以上十款共支庫平銀八萬一千七百五十三兩六錢二分  
五釐五毫三絲二忽八微四纖應歸工部核銷

一支致遠等船洋員料理登哈樸里倍葛雷維白羅們他耳等四

名回國川費庫平銀一千五百六十九兩四錢六分三釐三毫

一支定遠鎮遠靖遠致遠經遠等船隊長水手升火管油人等共

十一員名卹賞庫平銀一百十兩九錢二分

一支三鐵艦訂購德國克鹿卜廠各項礮彈駿運及保險費庫平

銀二千五百六十八兩六錢六分四釐二毫四絲八忽一微七纖

一支三鐵艦所設礮位購用德國克鹿卜廠子彈引火等件運存

上海招商局保險費庫平銀一百二兩六錢四分五釐六毫

一支四快船軍火等件在滬駁運等費庫平銀一百八兩三錢四

分八釐五毫

以上五款共支庫平銀四千四百六十兩四分一釐六毫四

絲八忽一微七纖應歸兵部核銷

統計十五款共支庫平銀八萬六千二百一十三兩六錢六



分七釐一毫八絲一忽一纖

實在

一應存庫平銀五萬七百六十五兩六錢九分一釐八毫六絲三忽九微九纖

查前項存款歸於十五年動用造報

請緩鹽課奏銷摺

光緒十六年四月十六日

奏爲按照歷屆成案請緩長蘆本年正課奏銷以恤商艱仍無誤協撥京奉各餉恭摺仰祈

聖鑒事竊據長蘆鹽運使額勒精額詳稱蘆商正課例限五月奏銷自同治十年後商情艱窘節經

奏准緩至十月啟徵茲因例限將屆催令各商完納據通綱商人晉有孚等一百十七商稟稱直豫魯被災被銷絀本虧商累實甚歷年蒙將正課展緩藉可專顧春秋兩運仍於秋運後趕緊完課並未誤解餉期限且能增交銀數有裨餉需蓋奏銷時日稍紓商力始能周轉今催令照限完課苟能遵辦曷敢視展緩爲常例惟本年春關出庫引僅十八九萬餘道過關鹽僅十五萬餘包尙未全數抵岸其豫省南岸各引地鄭工雖已合龍而運路未盡通暢

戶口尙復彫殘銷數極形艱滯上年完交課款竭廩萬分今鹽既難銷課從何措此外未經築運各商交款愈多拮据更甚蘆商累多殷少全指秋後賣鹽以完現課此時實萬難兼顧懇將本屆正課奏銷按照歷屆成案展緩該運司詳加體察確係實情若令依限完納力實未逮徒事參追無裨實際請緩至十月啟徵仍可無誤京奉各餉並聲明永屬鹽課奏銷應屆時隨同辦理以憑彙計分數等情具詳前來臣查長蘆正課前因商情艱窘次奏請展緩均經蒙

恩允准但可依限催納豈容稍任稽延惟商累甚深刻值告運喫緊鹽尙未銷斷難籌措課款既經查明屬實相應按照歷屆成案

籲懇

天恩俯准將光緒十六年正課奏銷緩至十月辦理以恤商艱卽

以保全課帑屆時當督飭運司認真催徵將本屆奉撥京奉各餉  
仍於年內解清斷不敢稍任遲誤理合恭摺具陳伏乞  
皇上聖鑒訓示謹  
奏

馬玉崑留營片

光緒十六年四月十六日

再據統領毅軍四川提督宋慶文稱記名提督馬玉崑自同治四年隨同毅軍轉戰直東豫皖陝甘各省十二年奉調出關隨大軍收復伊犁西陲肅清留統防營積功至記名提督博奇巴圖魯賞穿黃馬褂雲騎尉世職光緒十五年七月交卸營務經伊犁將軍色楞額保奏給咨赴部引

見並懇

恩賞假六箇月回籍省親現已假滿北來便道先赴旅順自願留營練習海疆防務暫緩入都等情請奏前來臣查馬玉崑樸實果決謀勇兼優隨宋慶轉戰南北最爲年久與各營將領氣誼素洽實該軍不可少之員海東防務正殷亦須廣備將材之選若將該提督留於旅順隨同練習操防足資得力除飭取履歷分咨查照

外理合附片陳明伏乞

聖鑒謹

奏

張夢元派辦機器局片

光緒十六年四月十六日

再天津機器局爲北洋海防水陸各軍根本關係重要近年西法日新製造繁曠事多人少必須添員經理查有開缺福建布政使張夢元廉正精詳條理綜覈前曾督辦福建船政於機器理法講求有素該員體疾雖未全愈其心思才力實未衰頽機器製造係海防軍實事宜非尋常局務可比擬派令該前司張夢元駐局會督員匠逐事逐物力求精進務令器必利用款不虛糜以收實效理合附片具陳是否有當伏乞

聖鑒訓示謹

奏

李文忠公奏稿卷六十七